

Prvi zamjenik visokog predstavnika apeluje na mlade ljude da preuzmu aktivnu ulogu u političkom životu Bosne i Hercegovine

Prvi zamjenik visokog predstavnika, Donald Hays, u utorak se sastao sa članovima kluba Mladih liberala. Na sastanku je razgovarano o pitanjima koja se tiču mladih, uključujući obrazovanje, zaposlenost, odlazak mladih iz Bosne i Hercegovine, njihovo učešće u organima vlasti, te zastupljenost žena u javnom životu.

Ambasador Hays je rekao svojim sagovornicima da je jedan od glavnih problema u Bosni i Hercegovini činjenica da nema generacije koja treba da naslijedi političke lidere, koja razumije šta znači modernizacija zemlje i poboljšanje uslova života njenih građana. "Ja sam se u cijeloj BiH susretao sa mladima poput vas," rekao je. "Povežite se s njima i pobrinite se da se vaš glas čuje kako bi zaista doveli do promjena. Mladi ljudi zajedno mogu predstavljati onu kritičnu masu koja neće dopustiti etničke podjele, koja neće tolerisati intelektualno etničko čišćenje u školama i na univerzitetima."

"Mnogi mladi ljudi ne osjećaju Bosnu i Hercegovinu kao svoju zemlju," rekao je jedan od učesnika na sastanku. "Ali mi želimo da mladi budu u zakonodavnim i izvršnim organima, i to ne samo zato što su mladi nego zato što su voljni i sposobni."

Drugi učesnik je istakao da "mladi ljudi imaju svježije ideje, i ukoliko političari stvore pozitivno okruženje za budući razvoj malih i srednjih preduzeća, ti mladi će postati poduzetnici.

Ali najprije država mora da donese zakone koji podstiču razvoj biznisa.”